

國朝耆獻類徵初編卷首之六

通奉大夫前署江西巡撫江西布政使司布政使臣李桓恭錄

欽定宗室王公功績表傳卷六

傳四親王

和碩鄭親王濟爾哈朗傳

濟爾哈朗追封和碩莊親王舒爾哈齊第六子舒爾哈齊

顯祖宣皇帝第三子

太祖高皇帝母弟初封貝勒歲丁未東海瓦爾喀部斐悠城長策
穆特赫苦烏拉部長之虐乞歸附

太祖命舒爾哈齊同貝勒褚英代善往收其環城屯寨五百戶以

還

賜號達爾漢巴圖魯事詳廣略貝勒褚英傳辛亥年八月薨順治十年五月追封和碩親王諡曰莊濟爾哈朗幼育於太祖宮中封和碩貝勒天命十年十一月同台吉阿巴泰等援科爾沁有功事詳饒餘敏郡王傳十一年四月征喀爾喀巴林部十月征扎魯特部並有功天聰元年正月同貝勒阿敏岳託阿濟格等征朝鮮師屢勝次平壤城朝鮮王李倧使請和阿敏仍欲進攻岳託不可濟爾哈朗以不宜深入可駐平山城以待和議之成遂引軍往與李倧議歲貢定盟而還事詳克勤郡王傳五月從上征明出廣甯舊邊進圍錦州同貝勒莽古爾泰等率偏師衛塔

山糧運遇明兵敗之尋移師甯遠與明總兵滿桂兵遇裏創力戰
大敗其眾二年五月以蒙古固特塔布囊自察哈爾移據阿拉克
綽特部舊地遇來歸我者輒行阻殺

命同貝勒豪格討誅之收其眾三年八月同貝勒德格類岳託阿
濟格等征明錦州甯遠焚其積聚多俘獲十月

上親統大軍由洪山口征明

命同岳託攻大安口毀其水門乘夜進擊走明馬蘭營援兵旦見
明兵立二營於山上濟爾哈朗先擊敗其眾追至馬蘭營殲之是
日自辰迄巳五戰皆捷降馬蘭營馬蘭口大安口三營兵趨石門
寨明援兵至者悉斬之寨中官民出降遂會大軍於遵化進薄北

京十二月同貝勒阿巴泰等徇通州焚其船克張家灣四年正月從

上圍永平先是劉興祚叛歸明與明巡撫袁崇煥同赴永平聞我軍將至遂趨太平寨道殺喀喇沁蒙古之以俘來獻者

上命濟爾哈朗與阿巴泰往捕追及於山海關斬興祚擒其弟興賢以獻大軍既克永平

命與貝勒薩哈璘統兵萬鎮守察倉庫閱士卒置官吏降明道員白養粹廢員孟喬芳楊文魁等以書招永平屬州縣於是灤州州同張文秀遷安縣知縣朱雲台副將王維城參將馬光遠守備李繼全千戶錢奇志相繼降三月

上旋蹕令阿敏顧託更守永平因趨迤西路招降榛子鎮乃還五年三月

命諸貝勒直言時政濟爾哈朗奏曰比者讞獄滋怨皆由諸臣自今當選賢良慎司刑憲七月初設六部

命掌刑部事八月從

上圍明大凌河城鑲藍旗兵圍西南濟爾哈朗軍爲策應旋同大貝勒代善等克近城臺堡十一月明總兵祖大壽以城降將旋師同貝勒多鐸往塔山東沿海截隘俘百餘人六年五月從

上征察哈爾林丹汗遁大軍次穆嚕哈喇克沁濟爾哈朗與岳託等率右翼兵趨歸化城收察哈爾部眾千餘七年三月奉

命築岫巖城五月明將孔有德耿仲明自登州航海來降濟爾哈朗等迎護其眾事具英親王傳六月

詔問征明及朝鮮察哈爾三者何先奏言朝鮮不遵約當反其貢物姑與互市不必往征明乃吾敵國宜取其近京數城久駐伺隙別屯兵山海以東錦州以西擾其耕穫使不得休息復分兵半於山海關前立營半繞入關後內外夾攻敵必絀八年五月

上復親征察哈爾濟爾哈朗留守

盛京崇德元年四月晉封和碩鄭親王十二月

上征朝鮮復畱守三年十月率兵征明甯遠薄中後所城明兵懼不敢出乃移師克模龍關及五里堡屯臺四年五月征明錦州及

松山與敵遇九戰九敗之俘二千有奇五年三月葺義州城

上親臨閱有舊附明之蒙古多羅特部蘇班岱阿巴爾岱居杏山西五里臺遣託克託內籲請率三十戶來歸

上命王與多鐸郡王阿達禮率師千五百往迎瀕行

諭曰敵見我兵寡必來拒戰可分兵爲前後中三隊前隊拒戰後隊應援遂辭

御營遵

諭乘夜過錦州城南至杏山令來使潛告蘇班岱等擣戶口輜重行旦明杏山總兵劉周智沿城結營與錦州松山守將分翼列陣備我軍王令駐軍待敵呼譟而來王督戰衝入敵陣與諸王貝勒

並進大敗之追奔至城下斬其副將楊倫周參將李得位復遣兵破敵兩營於城南獻所獲馬械於

御營分賚有差加

賜御廄良馬一九月同武英郡王阿濟格等圍錦州城中兵屢出犯王設伏城南俟敵知有伏卽遁追斬六十餘人又遣輔國將軍務達海俘明運糧兵於杏山塔山間六年三月復圍錦州繞城立營八掘壕築塹爲久困計時大壽在城中以蒙古兵守外郛蒙古台吉諾木齊吳巴什等欲降繩二人齎書下約獻東關至期爲大壽覺而鬪聲聞郛外大軍薄城蒙古兵繩以上我師與蒙古合擊明兵明兵敗入內城遂據其郛遷郛內蒙古六千餘口於義州

並收降明都司守備以下八十六員使馳奏

上命入門擊鼓集眾官宣捷於

篤恭殿四月明援兵自杏山至松山王令右翼兵伏錦州南山西岡左翼兵伏於山北嶺遣前鋒軍挑戰敵至伏起夾擊大敗之五月明援兵六萬屯松山北岡擊斬二千人六月睿親王多爾袞等至錦州更代兩軍合營聞明兵自松山趨海口我左翼兵由東右翼兵由西擊卻敵眾追至松山城獲馬五十餘振旅還八月明總督洪承疇率兵十三萬至松山

上親統大軍臨之

命畱守九月

上將旋蹕仍赴錦州更代圍城十二月敗承疇承疇夜犯正紅正
黃兩旗營敵兵從杏山宵遁者復爲我伏兵所殲七年二月肅親
王豪格等克松山城擒承疇王仍圍錦州三月大壽遣人乞降請
盟誓王畱其使二人遣一傳諭曰我圍困此城旦夕可取何與爾
盟誓欲降則降非相強也大壽乃率眾赴營降四月移師塔山克
之進圍杏山以礮毀城城中懼開門降乃籍俘數以奏奉
命毀塔山松山杏山三城而還七月敘功

賜鞍馬一蟒綬百八八年八月

世祖章皇帝嗣位王與睿親王多爾袞同輔政九月征明甯遠拔
中後所城斬遊擊吳良弼都司王國安等進攻前屯衛斬總兵李

輔明袁尙仁中前所總兵黃色棄城遁取之遂班師順治元年正月王集內三院六部諸大臣諭以政事先白睿親王書銜名亦先之五月睿親王入山海關擊走流賊李自成九月王扈

駕至京師十月

上御皇極門封信義輔政叔王

賜金千兩銀萬兩緞千匹四年二月以造第踰制擅用銅獅銅龜銅鶴罰錠罷輔政五年三月貝子屯齊等訐王在

盛京時不舉發兩黃旗大臣謀立肅親王私議及扈

駕入關擅令兩藍旗越次立營前行等事降多羅郡王閏四月復爵和碩鄭親王九月

命爲定遠大將軍征湖廣十月道出山東勦曹縣土賊擒獲賊首
李化鯨李名讓張學允等得降鎮劉澤清逆書煽亂狀以
聞叛黨並伏誅六年正月由安陸府渡江抵長沙時明桂王朱由
榔之總督何騰蛟及附由榔之總兵馬進忠王進才杜允熙陶養
用胡一青糾流賊餘黨一隻虎等據湖南府縣王令順承郡王勒
克德渾都統阿濟格尼堪爲前哨大軍繼進抵湘潭生擒騰蛟拔
其城四月分兵趨永興擊走允熙遂至辰州一隻虎聞風遁令尚
書阿哈尼堪等擊進才於寶慶克其城又遣破南山坡大水洪江
諸路兵凡二十八營寶慶平七月分兵定靖州進衡州斬養用破
一青七營於城南山追勦至廣西全州分兵定道州黎平府及烏

撒土司先後收六十餘城七年正月凱旋敘功

賜金二百兩銀二萬兩八年二月同巽親王滿達海端重親王博洛敬謹親王尼堪奏削故睿親王封爵事詳睿忠親王傳三月上以王年老一切朝賀謝恩悉免行禮九年二月晉封叔和碩鄭親王十二年二月疏言

太祖高皇帝開勑初日與四大貝勒五大臣及眾台吉等討論政務得失咨訪兵民疾苦使上下交孚鮮壅蔽故能上合

天心下洽民志埽靖羣雄肇興大業

太宗文皇帝繼承大統紹述前猷亦時與諸王貝勒大臣講論不輟且崇獎忠直鼓勵英傑錄微功棄小過凡下詔令必先講求可

以順民心垂久遠者然後施行又慮武備廢弛不忘騎射時
駕出射獵諸王貝勒置酒讌會以優爲樂

太宗皇帝還自獵所克勤郡王岳託發其事

太宗皇帝勃然怒曰我國肇興治弓矢繕甲兵視將士若赤子故
人爭效死每戰必克以成大業朕常恐後世子孫棄我國淳厚之
風沿習漢俗卽於慆淫今汝等爲此荒樂欲國家興隆其可得乎
遣大臣索尼再三宣

諭今

皇上詔大小臣工盡言無隱誠欲立綱陳紀繇國祚於無疆也臣
以爲平治天下莫要於信詔令順民心前降

諭軫恤滿洲官兵疾苦聞者無不懼忭嗣又令修

乾清宮詔令不信何以使軍民服從伏祈效法

太祖

太宗不時與內外大臣詳究政務得失凡事必豫商榷然後頒之
詔令見諸施行庶幾法行令信可以紹

二聖之休烈矣抑臣更有請者垂休典謨廣昭令德莫要於立史
官古聖帝明王進君子遠小人順天心合民志措天下於太平垂
鴻名於萬世良於吏臣有賴今宜倣古制特設
起居注官置之左右凡

聖主嘉言懿行一一記載於以垂萬世傳無窮亦治道之一助也

上嘉納之三月同貝勒尙善等議吏科副理事官彭長庚正白旗一等子許爾安請復睿親王舊封妄頒功勳結黨煽亂應立斬

上命從寬流徙又議廣東布政使胡章誣奏平南王尙可喜靖南王耿繼茂縱兵占官廨等事與誣告凡人不同應立絞

上命褫職免罪五月王疾劇

駕臨問王奏臣受

三朝厚恩未能仰答不勝感痛惟願以取雲貴滅桂王爲念且滿洲兵甚少而能破流賊取京都應加撫恤

上垂涕曰天何不令朕叔長年耶言已大慟

駕旋